

Nóta míniúchán a ghabhann leis an togra le haghaidh athbhreithniú ar an Rialachán maidir le cabhair *de minimis*

Tiocfaidh an dréacht-Rialachán *de minimis* in ionad [Rialachán *de minimis* 1407/2013](#)¹ atá le dul in éag an 31 Nollaig 2023. Tá sé bunaithe ar thorthaí meastóireachta cuimsithí a rinneadh ar bheartas státhabhrach, mar atá [an tSeiceáil Oiriúnachta](#)². Seoladh [Glao ar Fhianaise](#)³ lenar ghabh tréimhse aiseolais a mhair ón 27 Meitheamh 2022 go dtí an 25 Iúil 2022. Fuarthas 132 aighneacht ón nGlao ar Fhianaise, ó chomhlachtaí agus comhlachais ghnó (tuairim is leath na n-aighneachtaí) agus údaráis phoiblí (tuairim is 27 % de na haighneachtaí) go príomha.

Cistiú poiblí a chomhlíonann na coinníollacha Státhabhrach a shainmhínítear in Airteagal 107(1) den Chonradh ar Fheidhmiú an Aontais Eorpaigh, ní mór, de ghnáth, é a fhógairt don Choimisiún agus é a bheith formheasta sula gcuirtear i bhfeidhm é. Is é is aidhm do na prionsabail is bun le rialacha an Aontais maidir le Státhabhair a áirithiú nach gcruthaítear iomaíocht éagórach do chuideachtaí a oibríonn laistigh de mhargadh inmheánach an Aontais. Níl sé d'oibleagáid ar na Ballstáit, áfach, fógra a thabhairt don Choimisiún má thagann an chabhair faoi thrácht faoin Rialachán *de minimis*.

Díolmhaítear suimeanna beaga ó rialú Státhabhrach sa Rialachán *de minimis* toisc nach meastar go bhfuil tionchar acu ar iomaíocht agus trádáil i margadh inmheánach an Aontais.

Sa dréacht-Rialachán, moltar na hathruithe seo a leanas i gcomparáid leis an Rialachán atá ann faoi láthair:

- (i) uasteorainn EUR 275 000 a bheith leis an méid cabhrach *de minimis* is féidir le gnóthas aonair a fháil in aghaidh an Bhallstáit thar aon tréimhse 3 bliana. Is é is aidhm don mhéadú sin an boilsciú a chur san áireamh (maidir leis an tréimhse 2014 go dtí 2030, ós rud é gur in 2006 a rinneadh an uasteorainn a mhéadú go deireanach agus gur cuireadh an tréimhse go dtí 2013 san áireamh ansin). An uasteorainn maidir le cabhair arb iasachtaí atá inti, cabhair ar ráthaíochtaí atá inti, agus cabhair le haghaidh gnóthas atá i mbun iompar lasta de bhóthar, tá an uasteorainn sin oiriúnaithe chomh maith.
- (ii) ceanglais trédhearcachta a neartú trí chlár poiblí éigeantach a thabhairt isteach ar an leibhéal náisiúnta nó ar leibhéal an Aontais ina soláthraíonn na Ballstáit faisnéis iomlán maidir le cabhair *de minimis* arna deonú ag aon údarás.

Na chéad chéimeanna eile

Tar éis comhairliúchán poiblí agus tar éis dul i gcomhairle leis an gCoiste Comhairleach, féadfaidh an Coimisiún an dréacht-Rialachán a athbhreithniú chun aiseolas na ngeallsealbhóirí agus na mBallstát a chur san áireamh.

¹ Rialachán (AE) Uimh. 1407/2013 ón gCoimisiún an 18 Nollaig 2013 maidir le cur i bhfeidhm Airteagal 107 agus 108 den Chonradh ar Fheidhmiú an Aontais Eorpaigh maidir le cabhair *de minimis* (IO L 352, 24.12.2013, lch. 1).

² Foilsíodh é an 30 Deireadh Fómhair 2020, féach: https://ec.europa.eu/info/law/better-regulation/have-your-say/initiatives/2044-Pacaiste-um-nuachoiriu-statchabhair-2012-treoirinte-do-na-hiarnroid-agus-arachas-creidmheasa-onnmhairiuchain-gearrthearmach-seiceail-oiriunachta_ga

³ Féach <https://ec.europa.eu/info/law/better-regulation/have-your-say/initiatives/13458-Statchabhair-dioliuinti-le-haghaidh-meideanna-beaga-cabhrach-cabhair-de-minimis-nuashonru- ga>

